

Oktòb 2011

konferans jeneral

Konsèy pou jèn yo

repantans

revelasyon

Sentespri

konferans jeneral

Konsèy pou jèn yo

Pa Prezidan Boyd K. Packer

Prezidan Kowòm Douz Apot yo

Malgre lopoziyon, eprèv yo ak tantasyon yo, nou pa bezwen febli ni krenn.

M ap pale ak jèn yo pi pèsònèlman pase m fè dabitid, an konparan jenès pa mwen ak pa yo.

Valè nou inestimab. Mwen wè nou nan plizyè dizèn peyi ak sou chak kontinan. Nou pi bon pase moun jenerasyon pa m nan nan laj nou. Nou konnen plis sou levanjil la. Nou gen plis matirite e nou .

Kounyeya mwen gen 87 an. Nou ka petèt ap mande kisa m ka pote ba nou nan laj mwen. Men mwen te pase kote nou ye a e mwen konnen kote nou prale. Men nou menm nou poko rive kote m ye a. M ap site kèk fraz nan yon powèm klasik:

*Kòbo granmoun nan vin mwens rapid  
 Se pa menm bagay la pou jèn kòbo a.  
 Sa jèn kòbo a pa konnen  
 Kòbo granmoun nan konnen l byen.  
 Nan zafê konesans, kòbo granmoun nan  
 Toujou rete mèt jèn kòbo a.  
 Kisa vye kòbo granmoun nan pa konnen?  
 Fason pou l ale pi vit.  
 Jèn kòbo a ap vole anwo, anba,  
 Epi fê wonn vye kòbo granmoun nan.  
 Kisa jèn kòbo rapid la pa konnen?  
 Ki kote pou l ale.<sup>1</sup>*

Se pa Wordsworth, men, se kanmèm yon powèm klasik!

Avèk tout sa k ap pase nan mond lan, avèk prensip moral yo k ap bese, nou menm, jèn zanmi m yo, n ap grandi nan teritwa enmi.

Ekriti yo aprann nou ke te genyen yon lagè nan syèl la epi Lisifè te an rebelyon epi, patizan l yo avèk li, “te chase desann sou tè a.”<sup>2</sup> Li detèmine pou kontrekare plan Papa nou ki nan syèl la e li chèche kontwole panse ak aksyon tout moun. Enfliyan li espiyèl, epi li “tout kote sou tè a.”<sup>3</sup>

Men, malgre lopoziyon, eprèv yo, ak tantasyon yo, nou pa dwe febli ni krenn.

A 17 an, lè m te prèske fini fini lekòl segondè e m te konsidere tèt mwen kòm yon elèv trè mwayen avèk kèk feblès, tout bagay te chanje bò kote nou, yon dimanch maten. Nan demen, yo te mande nou pou nou te reyini nan oditoryòm lekòl la. Sou podyòm nan te gen yon chèz ak yon ti radyo. Direktè lekòl la te limen radyo a. Lè sa a nou te tande vwa Prezidan Franklin Delano Roosevelt ki te anonse ke yo te bonbade Pearl Harbor la. Etazini te antre nan lagè avèk Japon.

Nan apre, sèn sa a te repete ankò. Nou te tandè vwa Prezidan Roosevelt ankò, fwa sa pou anonse ke peyi nou te nan lagè avèk Almay. Dezyèm Gè Mondyal la te eklate nan tout mond lan.

Toudenkou, avni nou te ensèten. Nou pa t konnen kisa k t ap tann nou pi devan. Èske nou t ap viv ase lontan pou nou marye ak fonde yon fanmi?

Jodia gen bri “lagè ak bri lagè, epi tout tè a nan gwo boulvès.”<sup>4</sup> Nou menm, jèn nou yo, petèt santi ensètitud ak ensekirite nan lavi nou. M ta renmen konseye nou, enstwi nou, ak ba nou avètisman sou kèk bagay pou nou fè ak kèk pou nou pa fè.

Plan levanjil la se “gwo plan bonè a.”<sup>5</sup> Fanmi se pwèn santral nan plan sa a. Fanmi an depann de bon itilizasyon pouvwa pou bay lavi a ki nan kò nou an.

Nan “Fanmi an: Yon Pwoklamasyon pou Mond lan,” yon dokiman enspire Premye Prezidans lan ak Kolèj Douz Apot yo te pibliye, nou aprann ke “nan egzistans premòtèl la” Tout kretyen vivan—gason ak fi—te kreye dapre imaj Bondye. Yo chak se yon pitit lespri gason oubyen fi ki soti nan paran selès, epi konsa, yo chak gen yon nati ak yon destine divèn. Maskilen ak feminen se yon karakteristik esansyèl pou moun ki premòtèl, ki mòtèl, [epi te etabli nan egzistans premòtèl sa a]...

“... Nou deklare pi lwen ke Bondye kòmande pou pouvwa sakre pwokreyasyon yo sèvi sèlman ant gason ak fi ki marye legalman.”<sup>6</sup>

Gwo chatiman Lisifè ak disip li yo te rale sou tèt yo sete ke yo pa t ap janm ka gen yon kò mòtèl.

Nan tout tantasyon na p rankontre, sa ki pi grav yo se sètènman sa ki gen pou wè ak kò nou yo. Non sèlman nou gen pouvwa pou kreye kò pou yon nouvèl jenerasyon, men nou gen libabit tou.

Pwofèt Joseph Smith te anseye, “Tout èt ki posede yon kò gen yon pouvwa sou sa ki pa gen kò yo.”<sup>7</sup> Konsa chak èt vivan ki gen yon kò fizik finalman gen pouvwa sou advèsè a. Nou sibi tantasyon akòz nati fizik nou, men nou gen pouvwa sou li menm ak zanj li yo tou.

Rive lè pou nou te fini lekòl segondè, anpil nan kamarad nou yo te ale nan lagè, kèk nan yo pa t janm tounen. Rès nan nou ki te rete yo t ap pral rantre nan lame. Nou pa t konn kisa lavni te rezève pou nou. Èske nou t ap siviv lagè a? Èske t ap gen yon bagay nan mond nou te konnen an ki t ap rete lè nou tounen?

Paske m te sèten ke m t apral anwole, mwen te rantre nan lame ayeryen. Rapidman, mwen te twouve m nan Santa Ana, Kalifòni, pou suiv premye fòmasyon pilot mwen.

Mwen m pa t gen yon fèm temwayaj ke levanjil la te vrè, men m te konnen ke pwofesè seminè m yo, Abel S. Rich ak John P. Lillywhite, te konnen li vrè. M te konn tandè yo temwaye, e m te kwè yo. M te reflechi konsa, “M pral konte sou temwayaj pa yo jistan m jwenn pwòp pa mwen. E se sa m te fè.

M te tandè pale de benediksyon patriyakal men m pa t resevwa youn. Nan chak pye, gen yon patriyach òdone ki te gen espri pwofesi ak espri revelasyon. Li otorize pou bay benediksyon prive ak pèsònèl pou moun ki vini avèk rekòmandasyon evèk yo. M te ekri evèk mwen pou mande yon rekòmandasyon.

J. Roland Sandstrom te patriyach òdone ki te viv nan pye Santa Ana a. Li pa te konnen anyen de mwen e li pa t janm wè m anvan sa, men li te ban m benediksyon mwen. Ladan m te jwenn repons ak enstriksyon.

Malgre ke benediksyon patriyakal yo trè prive, m pral pataje yon ti pasaj nan pa m nan: “Ou pral gide pa mwayen enspirasyon Sentespri a e ou va jwenn

avètisman sou danje. Si ou tande avètisman sa yo, Papa nou ki nan syèl la ap beni ou pou ou ka reyini ankò avèk moun ou renmen yo.”<sup>8</sup>

Mo *si* a, malgre l te ekri tou piti, te parèt menm lajè ak paj la. M t ap jwenn benediksyon pou retounen lakay mwen apre lagè a *si* m respekte kòmandman yo e *si* m koute enspirasyon Sentespri yo. Malgre ke m te resevwa don sa a nan batèm mwen, m pa t ko konn kisa enfliyans Sentespri a te ye ni kijan enspirasyon li te fonksyone.

Sa m te bezwen konnen konsènan enspirasyon an, mwen te jwenn ni nan Liv Mòmòn an. M te li ke “zanj yo pale avèk pouvwa Sentespri a; se poutèt sa, yo pale pawòl Kris la yo. Se poutèt sa . . . fè yon festen ak pawòl Kris la yo; paske gade, pawòl Kris yo pral di nou tout bagay nou dwe fè.”<sup>9</sup>

Petèt bagay ki pi gwo m te aprann nan li Liv Mòmòn an sèke vwa Lespri a vini kòm yon *santiman* plis pase yon son. Nou pral aprann, menm jan m te aprann nan, “pote atansyon” ak vwa sa a ke nou *santi* plis pase nou *tande* a.

Nefi te reprimande gran frè l yo nan pawòl sa yo: “Nou te wè yon zanj, e li te pale avèk nou; wi, e nou te tande vwa l tanzantan; e li te pale avèk nou avèk yon ti vwa dous, men nou te san sansiblite, ki fè nou pa t kapab santi pawòl li yo.”<sup>10</sup>

Kèk kritik di ke vèsè sa yo gen erè paske nou *tande* pawòl, nou pa *santi* yo. Men si nou konnen yon ti bagay nan zafè kominikasyon enspiryèl, nou konnen ke pi bon tèm pou dekri sa k ap pwodui a se mo *santi* a.

Don Sentespri a, si nou dakò, pral gide nou ak pwoteje nou, e menm korije aksyon nou yo. Se yon vwa espiryèl ki vini nan lespri nou tankou yon panse oswa yon santiman ki plase nan kè nou. Pwofèt Enès te di, “Vwa Senyè a te vini nan panse m.”<sup>11</sup> Epi Senyè a te di Oliver Cowdery, “Gade, m ap pale ou nan lespri ou ak nan kè ou, pa mwayen Sentespri a, ki pral vini sou ou.”<sup>12</sup>

Pèsonn pa atann ke n ap travèse lavi a san nou pa fè erè, men nou pa p fè erè grav san nou pa dabò avèti pa enspirasyon Sentespri a. Pwomès sa aplike pou tout manm yo nan legliz la.

Gen moun ki pral fè erè ki terribleman grav e ki pral transgrese lwa levanjil yo. Sa se moman pou nou sonje Ekspyasyon an, repantans, ak padon total pou nou ka vin pwòp ankò. Senyè a di, “Gade, yon moun ki repanti pou peche l, moun sa a padone, epi mwen menm, Senyè a, m pa sonje peche yo ankò.”<sup>13</sup>

Si sa rive ke advèsè a fè nou prizonye akòz peche, m ap raple nou ke nou gen kle ki pral louvri pòt prizon an alenteryè. Nou ka lave pou vin pwòp pa sakrifis ekspyatwa Sovè a Jezikri.

Nou gen dwa, nan moman twoub yo, panse ke nou pa merite sali paske nou te fè erè, gwo oswa piti, e ou panse ou pa gen okenn chans. Sa pa *janm* vrè! Repantans sèlman ka geri sa ki blese. Men repantans *kapab* geri blesi yo, kèlkeswa sa yo ye.

Si ou enplike nan bagay ou pa t dwe ladan, oswa si ap frekante moun k ap rale w mennen nan move direksyon, se moman pou afime endepandans ou, libabit ou. Koute vwa Lespri a, e ou p ap egare.

M ap repete ke jèn yo jodia ap grandi sou teritwa enmi, nan yon atmosfè prensip moralite k ap deperi. Men, antanke yon sèvitè Senyè a, mwen pwomèt nou ke n ap pwoteje e jwenn sekirite kont atak advèsè a *si* nou kote enspirasyon Sentespri yo.

Abiye nou avèk desans, pale avèk reverans, koute mizik edifyan. Evite tout imoralite ak pratik pèsonèl degradan. Pran kontwòl lavi nou epi angaje tèt nou pou rete vanyan. Paske nou konte sou nou anpil konsa a, n ap remakabman beni. Nou pa janm lwen je Pè Selès eman nou an.

Fòs temwayaj mwen vin chanje depi moman m te santi bezwen pou apiye sou temwayaj enstriktè seminè m yo. Jodia m apiye sou lòt moun lè m ap mache akòz laj mwen ak maladi polyo m te fè nan anfans mwen, men pa akòz dout konsènan bagay espartyèl yo. M te aprann kwè, konprann, ak konnen verite presye levanjil yo ak Sovè a, Jezikri.

Antanke youn nan temwen espesyal li yo, mwen temwaye ke rezilta batay sa a ki te kòmanse nan lavi premòtèl la asire. Lisifè ap pèdi.

Talè a nou te pale de kòbo. Nou menm, jèn kòbo yo, nou pa bezwen vole pasi pala ak san destinasyon, san nou pa vrèman konnen sa ka p tann nou devan. Gen moun ki konnen chemen an, “Asireman Senyè Bondye a pa p fè anyen, san li pa revele sekre li bay sèvitè li pwofèt yo.”<sup>14</sup> Senyè a òganize legliz li a sou prensip kle ak konsèy.

Nan tèt legliz la, gen ken z gason ki soutni kòm pwofèt, vwayan, ak revelatè. Chak manm Premye Prezidans lan ak Kolèj Douz Apot yo gen tout kle prèttriz la ki nesèsè pou dirije legliz la. Dwayen Apot yo se Pwofèt-Prezidan Thomas S. Monson, ki se sèl moun sou tè a ki gen otorite pou egzèsè tout kle sa yo.

Ekriti yo prevwa ke Premye Prezidans lan ak Kolèj Douz Apot yo travay an konsèy epi desizyon konsèy sa yo fèt alinanimite. E se konsa sa fèt. Nou gen konfyans ke Senyè a ap trase chemen an e n ap chèche sèlman pou fè volonte li. Nou konnen ke li te plase anpil konfyans nan nou, endividyèlman ak kolektivman.

Nou dwe aprann “fè Senyè a konfyans ak tout kè nou; epi pa konte sou pwòp konpreyansyon pa nou.”<sup>15</sup> Nou dwe rete fidèl epi antoure tèt nou ak zanmi ki vle rete menmjan an.

Pafwa nou ka tante pou fè menm rezonman mwen te fè a nan jenès mwen an: “Nan vitès bagay yo prale la a, mond lan pral fini. Fen mond lan ap rive anvan m rive kote m dwe rive a.” Se pa vre! Nou bezwen prepare pou nou fè

bagay yo jan sa dwa: marye, gen yon fanmi, wè pitit nou, pitit pitit nou, petèt menm aryè pitit pitit nou.

Si nou suiv konsèy sa yo, n ap pwoteje epi, gras ak enspirasyon Sentespri a, n ap konnen pou tèt pa nou ki kote pou nou ale, paske “pa pouvwa Sentespri a nou kapab konnen verite nan tout bagay.”<sup>16</sup> Mwen pwomèt nou ke se sa k pral fèt e mwen mande Bondye pou beni nou, nou menm, jèn plen valè nou yo. Nan non Jezikri, amèn.

Nòt

1. John Ciardi, “Fast and Slow,” *Fast and Slow* (1975), 1.
2. Revelasyon 12:9; gade tou Doktrin ak Alyans 76:25--26.
3. Doktrin ak Alyans 52:14.
4. Doktrin ak Alyans 52:14.
5. Alma 42:8.
6. “Fanmi an: Yon Pwoklamasyon pou mond lan,” *Lyawona* ak *Ensign*, Nov. 2010, 129.
7. *Enseignements des Présidents de l’Eglise: Joseph Smith* (2007), 211.
8. Benediksyon Patriyakal Boyd K. Packer, Jan. 15, 1944, 3.
9. 2 Nefi 32:3.
10. 1 Nefi 17:45; anfaz ajoute.
11. Enòs\_1:10.
12. Doktrin ak Alyans 8:2.
13. Doktrin ak Alyans 8:2.
14. Amòs 3:7.
15. Pwovèb 3:5.
16. Mowoni 10:5.